

Ислом ҳақ дин, «менимча...» эмас



22:23 / 13.02.2018 3303

Агар ҳақ уларнинг ҳавои нафсларига эргашса, албатта, осмонлару ер ва улардаги кимсалар бузилиб кетар эди. Йўқ! Биз уларга ўз шарафларини келтирдик. Улар эса шарафларидан юз ўгирувчиидирлар.

Ҳақ битта, яъни Аллоҳнинг динидир. Ҳамма ҳаққа эргашмоғи лозим. Аммо коғирлар ҳақни чегараламоқчи бўладилар. Ҳақни ўз хоҳишларига бўйсундиришни истайдилар. Мушриклар ҳақ ўзларининг ҳавои нафсларига эргашишини хоҳлайдилар. Шунинг учун ҳам: «Менимча, дин ундей бўлиши керак ёки бундай бўлиши лозим, пистон нарса билан чегараланиши зарур», – дейдилар.

«Агар ҳақ уларнинг ҳавои нафсларига эргашса, албатта, осмонлару ер ва улардаги кимсалар бузилиб кетар эди».

Чунки ҳақ битта, одамларнинг ҳавои нафслари эса чексиздир. Шунинг учун ҳам ҳавои нафс ила ҳақиқатга эришиб бўлмайди. Қачон ҳавои нафснинг кўйига тушилса, фасодга учралади. Фасодга учрамаслик учун ҳақ одамларнинг ҳавои нафсига эмас, балки одамларнинг ҳавои нафслари ҳаққа тобе бўлиши керак. Одамлар динни эмас, дин одамларни чегаралаши лозим. Аллоҳдан келган ҳақ – Ислом одамларни йўлга солиши лозим. Аммо одамлар у ҳақдан – Исломдан юз ўғирмоқдалар. Ҳақни –

Исломни ҳавои нафслариға эргаштиришни истамоқдалар.

«Йўқ!»

Уларнинг бу ишлари нотўғри! Ҳақдан юз ўгиришлари ҳам, ҳақни ҳавои нафслариға тобе қилмоқчи бўлишлари ҳам нотўғри!

«Биз уларга ўз шарафларини келтирдик».

Биз келтирган Қуръон – Ислом – ҳақ улар учун шарафдир. Ким ҳаққа эргашса, амал қилса, шон-шарафга эга бўлади.

«Улар эса шарафларидан юз ўгирувчиidlар».

Уларнинг Аллоҳ таолонинг динидан юз ўгиришлари ўзларига аталган шон-шарафдан юз ўгиришларидир.

Биз «шараф» деб таржима қилган сўз оятда «зикр» лафзи билан келган. «Зикр» эслаш, ёд қилиш маъносини ҳам англатади. Бу оятда одамлар томонидан зикр қилиб юриладиган даражада мартабага эриштирадиган нарса кўзда тутилганини эътиборга олган уламоларимиз бу оятдаги «зикр»ни «шараф» деб таъвил қилганлар. Мисол учун, араблар Исломгача инсоният тарихида ҳеч зикр этилмас эди. Исломдан сўнг улар зикрга эришдилар. Бутун дунё уларни зикр қиласиган бўлди. Бу эса улар учун шарафдир.

Шайх Муҳаммад Содик Муҳаммад Юсуф

(Тафсири ҳилол китобидан)